



- SENAT -

Broj: 01-15-18/26

Sarajevo, 15. 07. 2026. godine

Na osnovu člana 61. Zakona o visokom obrazovanju („Službene novine Kantona Sarajevo“, broj: 36/22 i 28/25) i člana 64. i člana 297. stav (1) Statuta Univerziteta u Sarajevu, a u vezi sa Zahtjevom Univerziteta u Sarajevu – Stomatološkog fakulteta i Univerziteta u Sarajevu – Stomatološkog kliničkog centra, broj: 01-1-3-1-22-2/26 od 08. 07. 2026. godine, Senat Univerziteta u Sarajevu je na 21. redovnoj sjednici, održanoj 15. 07. 2026. godine, *dao*

AUTENTIČNO TUMAČENJE

odredbe člana 124a. stav (1), a u vezi sa čl. 108., 109a., 113a., 116a., 116b., 124b., 124c., 124e. i 295a. Statuta Univerziteta u Sarajevu, broj: 01-14-35-1/23 od 26. 07. 2023. godine, sa pripadajućim izmjenama, dopunama i autentičnim tumačenjima

Odredbom člana 297. stav (1) Statuta Univerziteta u Sarajevu propisano je da obavezno i autentično tumačenje odredaba Statuta daje Senat Univerziteta u Sarajevu.

Odredba člana 124a. stav (1) Statuta, prema kojoj za direktora Univerziteta u Sarajevu – Stomatološkog kliničkog centra može biti izabrano lice u radnom odnosu na Univerzitetu u Sarajevu – Stomatološkom kliničkom centru koje posjeduje izbor u zvanje vanrednog ili redovnog profesora na Univerzitetu u Sarajevu – Stomatološkom fakultetu, tumači se sistemski i funkcionalno, u vezi sa statusom, djelatnošću, unutrašnjom organizacijom i međusobnom povezanošću ove dvije punopravne članice Univerziteta.

Univerzitet u Sarajevu – Stomatološki klinički centar predstavlja poseban organizacioni oblik punopravne članice Univerziteta, čija je zdravstvena i stručna djelatnost neposredno povezana sa nastavnom, naučnom i stručnom djelatnošću Univerziteta u Sarajevu – Stomatološkog fakulteta. Stomatološki klinički centar istovremeno predstavlja nastavnu bazu Stomatološkog fakulteta u kojoj se realizira klinički i praktični dio studijskog programa stomatologije.

Sastav Stručnog vijeća Stomatološkog kliničkog centra, utvrđen članom 109a. Statuta, u kojem učestvuju šefovi klinika i zdravstveno osoblje koje ima izbor u zvanje docenta, vanrednog ili redovnog profesora na Stomatološkom fakultetu, potvrđuje institucionalnu, stručnu i funkcionalnu povezanost Stomatološkog kliničkog centra i Stomatološkog fakulteta.

U smislu primjene člana 124a. stav (1) Statuta, uvjet za izbor direktora ispunjava i lice koje je u radnom odnosu sa punim radnim vremenom na Univerzitetu u Sarajevu – Stomatološkom fakultetu i koje posjeduje izbor u zvanje vanrednog ili redovnog profesora na toj članici, pod uvjetom da bude izabrano za direktora odlukom Stručnog vijeća Stomatološkog kliničkog centra i imenovano rješenjem rektora Univerziteta u Sarajevu, u postupku propisanom Statutom. Izbor i imenovanje na funkciju direktora Stomatološkog kliničkog centra ne zahtijevaju zasnivanje novog radnog odnosa sa punim radnim vremenom na Stomatološkom kliničkom centru, niti prestanak postojećeg radnog odnosa izabranog lica na Stomatološkom fakultetu. Izabrani direktor zadržava postojeći ugovor o radu i radnopravni status koji ostvaruje na osnovu izbora u akademsko zvanje na Stomatološkom fakultetu, dok rukovodne poslove

direktora Stomatološkog kliničkog centra obavlja na osnovu odluke Stručnog vijeća o izboru i rješenja rektora o imenovanju. Nastavne, naučne i stručne poslove izabrani direktor nastavlja obavljati u skladu sa važećim izborom u akademsko zvanje, ugovorom o radu, planom pokrivenosti i realizacije nastave, Standardima i normativima i drugim općim aktima Univerziteta, u obimu koji je usklađen sa obavljanjem rukovodne funkcije direktora. Način izvršavanja rukovodnih poslova, mjesto rada, obim prava, obaveza i odgovornosti, funkcionalni dodatak, korištenje radnog vremena i druga pitanja značajna za obavljanje funkcije direktora mogu se, prema potrebi, preciznije urediti odgovarajućim pojedinačnim aktom, odnosno ugovorom, u skladu sa zakonom i općim aktima Univerziteta. Takav akt nema karakter zasnivanja drugog radnog odnosa.

Prilikom provođenja konkursa za izbor direktora, prijava kandidata ne može se smatrati neurednom niti kandidat može biti isključen iz postupka samo zbog činjenice da radni odnos sa punim radnim vremenom ostvaruje na Univerzitetu u Sarajevu – Stomatološkom fakultetu, ukoliko posjeduje izbor u zvanje vanrednog ili redovnog profesora i ispunjava ostale uvjete za izbor direktora propisane Statutom.

Odredbe člana 124e. Statuta o imenovanju vršioca dužnosti direktora primjenjuju se radi osiguranja kontinuiteta rukovođenja do izbora i imenovanja direktora, pri čemu se ovim autentičnim tumačenjem ne mijenja Statutom propisano najduže trajanje mandata vršioca dužnosti direktora.

Odredbe člana 124a. stav (1), u vezi sa čl. 108., 109a., 113a., 116a., 116b., 124b., 124c., 124e. i 295a. Statuta, ne mogu se tumačiti na način koji bi zbog posebne organizacione strukture i međusobne povezanosti Stomatološkog fakulteta i Stomatološkog kliničkog centra doveo do faktičke nemogućnosti izbora direktora, diskontinuiteta rukovođenja, nemogućnosti zastupanja članice ili ugrožavanja obavljanja njene zdravstvene, stručne i nastavne djelatnosti.

Shodno navedenom, lice koje ispunjava uvjete utvrđene ovim autentičnim tumačenjem može biti izabrano i imenovano za direktora Univerziteta u Sarajevu – Stomatološkog kliničkog centra, pri čemu rukovodne poslove obavlja na osnovu odluke o izboru i rješenja o imenovanju, a zadržava postojeći ugovor o radu i radnopravni status na Univerzitetu u Sarajevu – Stomatološkom fakultetu.

Ovo autentično tumačenje primjenjuje se dok Univerzitet u Sarajevu – Stomatološki klinički centar djeluje kao posebna punopravna članica Univerziteta i dok su odredbe koje su predmet tumačenja na snazi.

Autentično tumačenje predstavlja integralni dio Statuta Univerziteta u Sarajevu i primjenjuje se od dana donošenja.

REKTOR

Prof. dr. Tarik Zaimović



Dostaviti:

- Univerzitet u Sarajevu – Stomatološki fakultet
- Univerzitet u Sarajevu – Stomatološki klinički centar
- Generalnom sekretaru Univerziteta u Sarajevu
- Internet stranica Univerziteta u Sarajevu
- U dokumentaciju Senata Univerziteta u Sarajevu
- Arhivi